



## **ETCRN EJJI PN ATU HANARUK TEMPU KONSULTA PUBLIKA BA LEI REPARASAUN NO KRIASAUN INSTITUISAUN HAKTUR CAVR**

Liafuan ne'e hatu'o husi Jose Caetano Guterres, Kordenador Komite Kordenasaun ETCRN relasaun ho planu Komisaun A PN atu hahu halao konsulta publika esbosu lei ba reparasaun no kriasaun Instituisaun haktuir CAVR. Jose salienta liu tan katak tuir informasaun nebe iha Komisaun A sei halao konsulta publika ba esbosu lei refere iha loron rua ka tolu nia laran iha Dili molok lori ba Parlamento Nacional hodi hetan aprovasaun.

ETCRN louva esforsu Komisaun A PN no Sociedade sivil balun nia inisiativa hodi hahu prosesu ne'e. Prosesu ne'e importante tebes hodi foti medidas urjente ba implementasaun rekomendasaun iha relatoriu Chega! tuir Rezolusaun no 34 /II 2009 nebe PN aprova iha loron 14 Dezembru 2009. Resolusaun ne'e fo tempu fulan tolu ba Komisaun A atu halo lei ida ba implementasaun relatoriu Chega!. Rezolusaun ne'e mos husu atu Estado Timor Leste hahu hola medidas nesesarius, konkreta no adekudo ba implementasaun rekomendasaun iha relatoriu CAVR.

Maske nune ETCRN triste ho planu Komisaun A nian nebe halo konsulta ne'e ho tempu nebe badak tebes. Tempu konsulta loron tolu deit e la halao iha base maibe dehan atu hili deit vitima sira nia representante balun mai Dili hodi partisipa konsulta refere. Prosesu hanesan ne'e la fo oportunidade ba povu tomak, liu-liu ba vitima sira iha baze atu partisipa iha prosesu halo lei refere. "Ita atu halo lei importante ida maibe halao ho marathona deit iha Dili". Hetok triste liu tan bainhira ita rona katak sira atu halo lei rua; lei kona ba kriasaun instituisaun hatuir CAVR no reparasaun ba vitima sira. Lei rua ne'e importante tebes ba vitima sira atu hatene saida mak iha lei ne'e nia laran. To'o ohin loron povu seidak hatene saida mak hakerek ona iha esbosu lei rua ne'e nia laran. Ita iha Dili deit mos la hatene halo nusa mak dehan konsulta deit iha tempu loron rua ka tolu?, Jose husu ho lian maka'as.

Tan ne'e ETCRN Ejji ba PN atu hanaruk tempu konsulta publika ba fulan neen (6) hodi halao konsulta didiak no klean ho entidade hotu no povu tomak, liu-liu ba vitima no familia vitima sira iha Distritu hotu iha Timor Leste. Ida ne'e importante atu fo oportunidade ba vitima sira atu hatene kona ba kontiudu husi lei refere no hetan mos ideia barak kona ba lei refere. ETCRN hanoin katak implementasaun rekomendasaun sira iha relatoriu Chega! tenke hatan ho dignidade. Tan ne'e prosesu halo lei refere mos tenke halao ho aberta no nakloke e ho tempu nebe naruk. Estado tenke hatudu duni nia maturidade politika hodi dignifika prosesu hotu ba implementasaun relatoriu CAVR. Ne'e importante atu hatudu ba vitima sira katak Estado ne'e dignifika duni sira terus.



**REDE REFLESAUN BA KRIZE TIMOR LESTE**  
Hp +670 7253877, Email: infoetcrn2006@yahoo.com

Eis staff senior CAVR ne'e hateten katak rekomendasaun iha relatoriu Chega! ne'e barak tebes mak relevante ba situasaun ohin lora nian no importante tebes hodi fo resposta ba sofrimentu povu nian durante luta ba libertasaun patria. Tan ne'e PN presiza halo konsulta ho profesional kona ba lei sira ba implementasaun rekomendasaun molok debate iha PN. Tuir Jose katak koalia kona ba implementasaun relatoriu Chega! presiza implementa ho prosesu integrado ida nebe tenke refleta duni asunto sira hanesan justisa, rekonsiliaun, reparasaun ba vitima, governasaun diak no transparansia hodi promove valores importantes hanesan direitus humanos, kultura responsabilidade (akuntabilidade), kultura naun violensia no selu-seluk tan.

Luizinho Martins, Membro Ezeutivu ETCRN

The East Timor Crisis Reflection Network (ETCRN) – Rede Reflesaun ba Krize Timor Leste nudar rede ida nebe hari iha Junu 2006 bainhira mosu krize politika no militar iha Timor Leste. Rede ne'e hari husi Joven Timor Oan lubun ida nebe iha interese no vizaun hanesan hodi promove diskusaun no debates ba asunto kritiku Nacional ruma nebe nasaun hasoru iha pasado, presente no futuro. Durante 2006-2009, ETCRN halao tiha forum ba diskusaun barak hodi kontribui hari dame iha Timor Leste. ETCRN mos adopta tiha ona relatoriu CAVR (Chega!) nudar padraun ida ba promosaun dame iha Timor Leste. ETCRN halao tiha ona forum reflesaun 24 iha Dili, Liquisa, Ermera no Baucau hodi kontribui ba programa Hamutuk Hari Konfiansa iha Timor Leste. Titullu ba Programa ne'e mak Refleta Chega! hodi promove Justisa iha Timor Leste. Alende promove Relatoriu Chega!, ETCRN mos halo advokasia ba Estado hodi tau matan ba distinu rekomendasaun no lian vitima sira nian iha Chega!